

# Манас үлгүр авч, маниг дахцхатн!

Мана Хальмг таньгъчиг шинэс тогтахми гисн Коммунистическ партин болн Советск правительствин шиндврär дживр кедж, бидн, дорас өсдж йовх багъчуд-тосхачнр, эврä газр талан, аавнр-ээджиртän, ахнр-дүүнртän ирдж бүүрлдж бääх гермүд бärхär, эврä төрски таньгъчин хотл балгъсн Элстин эвдркä гермүд ясх болн шинэс гермүд бärхär, таньгъчин партийн комите-тин, комсомолин болн багъчудин дуудврар ирлä бидн.

Тиним сääхн тоомсртагъар ирсн бидн олна нүүрт чирäгъән улалгъш угагъар, ик гидгär киндж, шундж кöдлх кергтävдн. Март сарин тавнд мана багъчудин комплексн бригад гидж бүрдлä. Августан зургъан долан күн билävдн.

Түрүн даругъан, аль-бис кергтä материал уга болад, зөвär зовлиътä болв. Тингä йовдж, бидн дасад, дамшад, иджлдäд, муугъин тоод орл уга йовбвдн. Тер түрүн үзм-джärн омгшад, бригадм бидн өсв. Ода деерän мана бригадт арвн негн багъчуд бääнä.

Мадн дунд, чолугъар эрс тävдг улс бääнä. Модна урчуд, талдан чигн урчуд бääнä. Эн хойр сарин эргцд мана бригад, дөрвäd өрк-бүл бääдг хойр гер кедж дуусв.

Ода, май сарин зургъанас авн, нääмäd өрк-бүл бääдг гер

эклдж бärджәнävдн. Сууринь цутхад дуусдж йовнавдн. Мана эн тосхлтд усар тетглгън сән биш. Дакад эн герин терз, үүдинь авч ирдж буулгъхларн, герин сүүр малтх ормд дегд шахмар буулгъдж. Эн хамг мана бригадин кöдлмшт саалтг болна.

Чолу болн цементин урсхлт зöблгън хол болна. Дакад, мана хот уудг гер дегд хол бэлад, тенднь күн олн болчкад, үнтä дала цаган үрәнä бидн.

Мана тосхлтд өөрхн кöдлмшч багъчуд хот уух гер гаргъхла ик сән болхми. Эн эрк биш кергтä төрмүдт маниг гардгч улс оньган өгч, нөкд, тус болхла мана кöдлмш шамдгдхми.

Мана бригад Алдр Октябрин 40-ч уктгч дөрлдänd, зурагъан 125 процент күүргдж күцäх үгән өглä. Мадн дунд, залхурл уга, шундж кöдлдг улс: Бадминов Аюк, Башангинов Арслнь, Кекеев Очр болн Барсуков Баатр. Эдн, өгсн үгән лавта кевär күцäджәнä.

Элстд бääсн мана олн багъчудиг, багъчудин ним комплексн бригад бүрдäгъäd эврä олна оньчтä, ик төрт нөкд болтн гидж дуудджанавдн.

**ПЕТР КУЦЕКОВ,**  
хальмг багъчудин комплексн  
бригадин бригадир.